

GODIŠNJI IZVJEŠTAJ

2022/2023.





SADRŽAJ

> UVODNA RIJEČ	3
> O NAMA	4
> PROCES ODABIRA STIPENDISTA	5
> SEDAMNAESTA STRANICA NAŠE PRIČE	7
> FONDACIJA HASTOR U BROJKAMA	9
> NAJZNAČAJNIJI DOGAĐAJI U 2022/2023. GODINI	10
> USPJESI STIPENDISTA	22
> VANNASTAVNE AKTIVNOSTI STIPENDISTA	26
> PREDSTAVLJANJE DIPLOMANATA I MAGISTRANATA 2022/2023	32
> RUKOVODSTVO ALUMNI KLUBA	35
> IZJAVE TRENUTNIH I BIVŠIH STIPENDISTA	38
> KLUB PRIJATELJA	40
> PRIDRUŽITE NAM SE	41

● UVODNA RIJEČ



Osvrtanje na rad i postignuća Fondacije Hastor u periodu koji donosi ovaj Godišnji izvještaj podsjetilo me na to koliko sam njen neprikosnoveni napredak i rast pratila i sama najprije 10 godina kao njena stipendistica potom kao uposlenik, a sada i kao direktorica. Vodilja Fondacije Hastor su riječi naših osnivača da se svjetlo dobrote ne gasi nikada ako naš plamen dijelimo s drugima i godine koje su prošle sve do danas pokazatelj su da se njeno svjetlo uistinu nije ugasilo, nego je plamen rastao sa svakom novom mladom osobom kojoj je Fondacija Hastor bila podrška i oslonac. Predivno je i nevjerovatno gledati kako taj plamen nastavi rasti svaki put kad dođe do onih kojima je najviše potreban – a to je pogled koji Fondacija Hastor ima priliku gledati punih 17 godina.

Godišnji izvještaj pred vama potvrdit će činjenicu da je Fondacija Hastor najveća obrazovna fondacija u regiji, čemu svjedoči broj naših stipendista koji iz godine u godinu raste, iznos godišnjih stipendija, stipendiranje kroz svih 12 mjeseci u godini uz mogućnost i 13. bonus stipendije. U 17 godina kontinuiranog rada i zalaganja dodijelili smo skoro 24.000 godišnjih stipendija, a zajedno s našim stipendistima ostvarili više od 1.700.000 volonterskih sati. Na posljednju brojku smo posebno ponosni, jer se radi o 1.700.000 sati u kojima su usađivane najljepše ljudske vrijednosti u naše stipendiste, u kojima su se razvijale njihove vještine i znanja i u kojima se doprinosilo izgradnji boljeg bosanskohercegovačkog društva. Fondacija Hastor osim materijalne podrške kroz mentorstvo, kao najsPECIFICNIJI vid volontiranja, svojim stipendistima pruža priliku za lični rast, razvoj i napredak, pruža im mogućnost da stječu vještine o kojima ne uče u školi i da svoja znanja i iskustva prenose na mlađe generacije.

Kao i svih dosadašnjih godina, naš fokus najviše je usmjeren na naše stipendiste i pronalaženje načina kako da ih bude još više i kako da iz Fondacije Hastor dobiju podršku i finansijsku potporu, ali i priliku za učenje, volontiranje i razvijanje u svom punom kapacitetu. Naši stipendisti su naša najveća motivacija, stoga nastojimo svakodnevno kreirati sadržaje koji će im biti korisni i kroz koje ćemo osigurati prenošenje znanja i pozitivnih vrijednosti sa starijih na mlađe stipendiste. Sve to, naravno, ne bi bilo moguće bez onoga što Fondaciju Hastor najviše izdvaja od svih drugih obrazovnih fondacija u regiji – volontiranja koje je naš najvažniji epitet i naša najbolja prezentacija i najbolji odraz onoga što radimo. Podstaknuti ovom činjenicom, u prethodnom periodu aktivno smo radili na tome da kreiramo još svrsishodniji, atraktivniji i kvalitetniji model volontiranja kako bismo našim stipendistima dali priliku da se razvijaju na raznim poljima djelovanja čineći pritom i dobro svojoj zajednici.

U želji da širimo pozitivne priče koje svakodnevno nastaju u Fondaciji Hastor i koje su pohranjene u njenom dugogodišnjem trajanju pokrenuli smo i Podcast Fondacije Hastor. Odlučili smo da na ovaj način podijelimo pozitivne priče i njima inspirišemo druge mlade ljude da rade na sebi i čine dobro drugima.

Na stranicama pred vama imat ćete priliku pročitati šta je to obilježilo 17. godinu našeg postojanja, na koji način je tekla priprema i kako izgleda naš novi model volontiranja, priču o Podcastu Fondacije Hastor kao i brojne inspirativne priče o uspjesima naših stipendista i bivših stipendista. Vjerujem da ćete nakon čitanja našeg godišnjeg izvještaja biti nadahnuti da činite dobro jer, kako to naši osnivači rekoše na početku, svjetlo dobrote se ne gasi nikada ako naš plamen dijelimo s drugima, a Fondacija Hastor to iz godine u godinu nastavlja dokazivati.

Lejla Donlagić

Direktorica Fondacije Hastor

O NAMA



Fondacija Hastor je neprofitna organizacija koja svojim djelovanjem na području gotovo čitave Bosne i Hercegovine od 2006. godine aktivno učestuje u osnaživanju mladih ljudi koji su pokretači pozitivnih promjena u svojim lokalnim zajednicama, ali i u čitavoj državi. Od 2006. godine, kada je počela s radom, Fondacija pod svoje okrilje uzima perspektivne i talentovane mlade osobe, kao i one koji dolaze iz socijalno ugroženih porodica kako bi svima pružila jednaku priliku za obrazovanje. Već od školskih klupa, Fondacija Hastor prati učenike do amfiteatarskih stolica na fakultetima i do prvih zaposlenja što je čini jedinstvenom fondacijom na ovim prostorima koja u kontinuitetu obezbjeđuje podršku učenicima i studentima.

U trendu masovnog odlaska mladih ljudi u druge države, zahvaljujući svom programu stipendiranja i mentorstva, već 17 godina pružamo mladim ljudima perspektivu unutar naše države te im dajemo priliku da razvijaju svoje potencijale i učestvuju u unapređenju lokalnih zajednica. Na taj način gradimo uspješne mlade ljude, stvaramo nove lidere i jačamo Bosnu i Hercegovinu. Hiljade mladih ljudi, naših bivših stipendista, uspješno smo pripremili za životne, time i poslovne izazove, profilirajući ih kroz podršku njihovom formalnom obrazovanju te volonterizam pod našim okriljem, da revnosno nastave širiti vrijednosti i misiju Fondacije Hastor. Ponosni smo što danas možemo vidjeti naše bivše stipendiste kao dobre, empatične i uspješne mlade ljude u ulogama asistenata na fakultetima, profesora, direktora, HR menadžera, IT stručnjaka, doktora, vlasnika i osnivača kompanija.

Kroz Fondaciju Hastor su prošle generacije uspješnih i mladih osoba koje su sada izgrađene ličnosti s uspješnim profesionalnim i porodičnim životima što na neki način predstavlja i sam uspjeh Fondacije. Ono što je zajedničko svakom stipendisti Fondacije Hastor jeste izgrađen osjećaj za pomaganje drugima i svojoj lokalnoj zajednici te osjećaj za odgovornost koja je izuzetno važan segment koji svaka mlada osoba mora spoznati. Pomaganje se najviše ispoljava kroz razrađen i precizno uređen sistem volontiranja koji stipendiste različitog uzrasta usmjerava ka najboljim načinima za lični razvoj i boljitak njihove lokalne zajednice. Svaki stipendista Fondacije Hastor je jednako važan jer svaki daje doprinos cjelokupnom bosanskohercegovačkom društvu. Kao vrijedni mravi koji konstantno rade za svoj mravinjak, tako i stipendisti Fondacije Hastor svojim malim koracima poboljšavaju svoje lokalne zajednice pa čak i cijelu državu čineći je pristupačnijom i perspektivnijom za sve njene građane.

Od početnih tri stotine stipendista, Fondacija Hastor danas broji više od dvije hiljade stipendista koji svojim volonterskim angažmanima oplemenjuju sebe i daju nadu u bolju budućnost u Bosni i Hercegovini.



● PROCES ODABIRA STIPENDISTA




Fondacija Hastor tokom cijele godine prima molbe za stipendiranje od strane učenika osnovnih i srednjih škola u Bosni i Hercegovini pismeno i elektronskim putem (preko online obrasca na web-stranici Fondacije Hastor). Molbe sadrže kontakte kandidata, kratak opis socio-ekonomskih uvjeta u kojima žive kandidati, kao i informacije o postignutom uspjehu u školi. Obrada pristiglih molbi vrši se jednom godišnje, u periodu februar/mart, nakon čega se kandidatima šalje zahtjev koji trebaju popuniti skupa s pratećom dokumentacijom koja može posvjedočiti o iskazanoj ekonomskoj situaciji i ostvarenom školskom uspjehu. Prikupljeni podaci se unose u softver koji automatski kreira rang-listu kandidata. Nakon toga, tim Fondacije Hastor posjećuje kandidate s najvećim brojem bodova. Nakon izvršene provjere stanja na terenu, stipendije se dodjeljuju određenom broju kandidata u ovisnosti od predviđenog budžeta za datu školsku godinu.

● ●

Studenti mogu postati stipendisti Fondacije Hastor ukoliko Fondacija objavi javni konkurs za prijem novih studenata. Konkurs za studente se objavljuje krajem godine. Prijavljivanje na konkurs se vrši isključivo online prijavom. Softver automatski kreira rang-listu kandidata na osnovu uspjeha na fakultetu te ekonomske situacije u porodici. Kandidati s najvećim brojem bodova bivaju pozvani na intervju s članovima Komisije za odabir stipendista.





● SEDAMNAESTA STRANICA NAŠE PRIČE

Niz godina uspješnog rada koji stoji iza imena Fondacije Hastor svjedočanstvo je da se jedino na plemenitoj namjeri može izgraditi priča za trajanje. Fondacija Hastor je kroz sve ove godine pokazala da je njena priča upravo takva – trajna i dugovječna, istrajna u težnji da stvori i osigura sigurno i motivirajuće okruženje za mnoge mlade ljude. Posve smo sigurni da nije slučajno da su prvi redovi njene priče ispisani u aprilu – mjesecu buđenja i nade, u proljeće – vremenu novih početaka. Fondacija Hastor je od svog prvog pa, evo, sve do sedamnaestog bila upravo to – nada i novi početak. Ovog aprila obilježili smo 17 godina naše priče, 17 godina postojanja jedne stamene organizacije čije temelje vrijeme nije poljuljalo već osnažilo.

Sedamnaestogodišnji uspješan rad koji stoji iza imena Fondacije Hastor posebno se potvrđuje impresivnim brojkama hiljada mladih ljudi, naših bivših i trenutnih stipendista, kojima smo olakšali školovanje, pružajući svima jednake prilike za napredak i izgradnju ličnosti te mijenjajući njihove živote nabolje.

Naši stipendisti su, pored kontinuirane finansijske i mentorske podrške koju dobijaju, privilegovani i jedinstvenom prilikom umrežavanja s mladima iz svih krajeva Bosne i Hercegovine kroz ostvarivanje mnogobrojnih poznanstava i prijateljstava u velikoj porodici Fondacije Hastor, sačinjenoj više od 2.000 mladih ljudi. Dosljednost davno postavljenoj misiji i proaktivno djelovanje na ostvarivanju naših ciljeva, u 17 godina djelovanja iznjedrilo je više od 1.700.000 volonterskih sati, a prvobitno okupljeni kolektiv i brojka od 304 dodijeljene stipendije, kontinuiranim i nesebičnim radom i zalaganjem, rezultirali su brojem od skoro 24.000 dodijeljenih godišnjih stipendija u 135 općina i gradova širom Bosne i Hercegovine.

Iz godine u godinu našu priču bogate i proširuju novi junaci. Ponosni smo na to što je Fondacija Hastor kroz sedamnaest godina kontinuirane podrške djeci i mladima ostvarila impresivne brojke. U ovih 17 godina stalo je mnoštvo uspjeha, sklopljenih prijateljstava, lijepih uspomena, osmijeha i ostvarenih snova. Sve ove stranice ispisali su mladi ljudi ove zemlje, njihovi su bili sati volontiranja i pomaganja drugima, njihovi su bili uspjesi i osmijesi i njihovi su bili ostvareni snovi. Fondacija Hastor već sedamnaest godine raste zbog humanosti, radosti, dobrote i uspjeha tih mladih ljudi koji su prošli i još uvijek prolaze njome kao njeni stipendisti. Baš zbog toga se radujemo svim stranicama koje tek trebamo ispisati.

U našoj zemlji nerijetko su manji gradovi zapostavljeni i djeca iz slabije razvijenih općina dobijaju manje prilika da pokažu svoja umijeća i znanja. Fondacija Hastor se potrudila da sruši zid koji je stajao kao prepreka toj djeci aktivno saradujući s više od 135 bosanskohercegovačkih općina. Rušeći te zidove i pružajući jednake šanse mladim ljudima iz svih dijelova Bosne i Hercegovine, Fondacija Hastor je postala simbol različitosti koje, ujedinjene u svojoj raznolikosti, ispisuju ovu nesvakidašnju priču.



Kroz ovih 17 godina Fondacija Hastor je iznjedrila mnogo uspješnih ljudi. Oni su živi primjeri kvalitete svega što Fondacija jeste i svega što radi i svojim dostignućima svakodnevno pokazuju da je volonterski rad ojačao njihovu volju, želju, ali i osjećaj za humanost i napredak na svim poljima. Svi naši stipendisti su individualnim napretkom doprinijeli napretku zajednice i postali inspiracija svome okruženju.

Godišnjica Fondacije Hastor, već 17 godina zaredom, predstavlja godišnjicu svih onih koji su u njejoj priči upisali svoje redove, svih onih zbog kojih ona još uvijek pruža priliku mladim ljudima da u toj priči ispišu svoje redove. Fondacija je kroz sve ove godine bila i zasigurno će biti uzdanica bosanskohercegovačke omladine i njihov put i način za napredak. Zatvaramo sad našu sedamnaestu stranu i zajedno s velikim ponosom otvaramo još jednu, spremnu za sve nove uspjehe, radosti i ostvarene snove.



FONDACIJA HASTOR U BROJKAMA

311

SUPERODLIKAŠA

553

ODLIKAŠA

NAŠE BROJKE
U 2022/23.

152

DIPLOMANATA I
MAGISTRANATA

OBRAZOVNIH INSTITUCIJA

600

DODIJELJENIH
GODIŠNJIH
STIPENDIJA

SKORO
24.000

NAŠ RAST
KROZ GODINE

VIŠE OD
2200

STIPENDISTA

VOLONTERSKIH SATI

VIŠE OD
1.700.000

135

OPĆINA



● NAJZNAČAJNIJI DOGAĐAJI U 2022/23. GODINI

➤ Potpisivanje ugovora o stipendiranju s učenicima stipendistima Fondacije Hastor za školsku 2022/23. godinu

Jedna od važnijih aktivnosti za Fondaciju Hastor svakako je potpisivanje ugovora o stipendiranju s učenicima stipendistima Fondacije koje je izvršeno početkom 2022/23. školske godine. Fondacija Hastor je jedna od rijetkih koja stipendira učenike i studente iz cijele Bosne i Hercegovine kroz svih dvanaest mjeseci u godini, stoga je potpisivanje ugovora za učenike osnovnih i srednjih škola bio dugotrajan proces koji je podrazumijevao odlazak u mnoge gradove i mjesta u našoj domovini.

S ponosom možemo kazati da stipendiju Fondacije Hastor primaju učenici i studenti iz skoro cijele Bosne i Hercegovine. Potpisivanjem ugovora o stipendiranju stipendisti se obavezuju da će biti marljivi i uzorni učenici te da će svakodnevno nastojati razvijati empatiju prema drugim ljudima u svome okruženju. Na taj način svi oni već u ranom dobu nauče važnost pomaganja onima koji tu pomoć trebaju, a to je jedan od najvažnijih ciljeva Fondacije Hastor. U toku perioda stipendiranja, svi stipendisti od Fondacije Hastor imaju kontinuiranu finansijsku podršku svih 12 mjeseci u godini kroz cjelokupno školovanje, sve dok se redovno školuju te bivaju uzorni učenici i odgovorni stipendisti. Također, svi stipendisti dobijaju i kontinuiranu mentorsku podršku i imaju priliku svoje volonterske sate kvalitetno provoditi sa svojim mentorima razgovarajući i učeći o brojnim temama koje su aktuelne i važne za današnjicu, ali i produbljujući svoja znanja iz školskih predmeta kako bi još više popravili svoj uspjeh. Dakle, pored finansijske podrške, svakom učeniku bude dodijeljen mentor koji će mu biti podrška tokom tokom cjelokupnog perioda stipendiranja.



➤ Potpisivanje ugovora o stipendiranju sa studentima stipendistima Fondacije Hastor za akademsku 2022/23. godinu

„Najveća nada svake zemlje leži u primjerenom školovanju mladih.“ – Erazmo Roterdamski

U novembru 2022. godine, činom potpisivanja ugovora o stipendiranju, Fondacija Hastor je zajedno sa svojim studentima stipendistima otvorila prvi list još jedne nove knjige koja je kao sve prethodne bila ispunjena novim i inspirativnim pričama.

Više od 500 studenata stipendista ponovo je potpisalo ugovore, a među njima je bilo studenata koji su stipendisti već 16 godina što govori o tome da Fondacija Hastor uz mnoge stipendiste ostaje sve do kraja njihovog obrazovnog puta. Pravi primjer za to je priča naše stipendistice Semre Islamović kojoj je ovo bio 14. po redu potpisani ugovor o stipendiranju.



Stipendistica sam Fondacije Hastor još od davne 2008. godine. Tada, sa svojih osam godina, još uvijek nisam bila svjesna kolika sam zapravo sretnica i šta to sve znači za mene, moje roditelje i moje dalje školovanje i obrazovanje. Od prvog dana Fondacija mi je bila ogromni vjetar u leđa i kada god bih im se obratila, uvijek su bili spremni pružiti podršku i pomoć kako meni tako i svim drugim stipendistima. Kroz volonterski rad sam upoznala mnoge ljude, stekla nova prijateljstva, postala samostalnija i kreativnija, spremnija na timski rad te sam razmijenila razna iskustva kako s djecom tako i s kolegama mentorima.



➤ Potpisani ugovori o stipendiranju s 30 novih stipendista primljenih po Konkursu za nadarene studente

Fondacija Hastor svake godine otvara vrata novim nadama bosanskohercegovačkog društva. Krajem 2022. godine, na osnovu pravila i kriterija Fondacije Hastor, raspisan je konkurs za dodjelu stipendija za redovne studente upisane prvi put u akademsku 2022/2023. godinu. Studenti koji su ostvarili pravo na prijavu su redovni studenti koji se školuju na akreditiranim visokoškolskim ustanovama u Bosni i Hercegovini.

Veliko je zadovoljstvo bilo vidjeti da zainteresiranost studenata za stipendiju Fondacije Hastor iz godine u godinu sve više raste. Taj broj ponajbolje svjedoči tome da je Fondacija Hastor unazad 17 godina uspješno izrasla u zajednicu koja okuplja mlade ljude koji su korisni članovi društva i doprinose mu volontirajući na razne načine.

Komisija za odabir stipendista odabrala je 30 onih koji su se posebno isticali svojim volonterskim angažmanima i društveno korisnim radom te su, pritom, zadržavali i izvanredan akademski uspjeh. Treba istaći i to da povećanjem broja stipendista svake godine Fondacija Hastor ne potpomaže samo pojedince već i cijelu zajednicu.



➤ April u slavljeničkom duhu - prigodnim programom obilježena 17. godišnjica postojanja i aktivnog djelovanja Fondacije Hastor

Najbolji način za slavljenje uspješnog rada i fantastičnih rezultata je upravo okupljanjem mlade pokretačke snage – studenata stipendista Fondacije Hastor na jednom mjestu koje ih sve čvrsto povezuje – u prostorijama Fondacije Hastor. Naime, zajedno s našim studentima stipendistima obilježili smo i proslavili 17 godina postojanja i uspješnog djelovanja Fondacije Hastor na području Bosne i Hercegovine, zajedničkim okupljanjem i prigodnim programom, prisjetivši se prvih koraka djelovanja. Poseban fokus druženja je bio na njegovanju potencijala mladih ljudi, naših članova, koji su upravo svojim aktivnostima u onome što najbolje znaju obogatili svečanost obilježavanja naše godišnjice. Na događaju je upriličeno i svečano proglašenje najboljih literarnih radova na temu *Kako je Fondacija Hastor promijenila moj život*.

Posebnost obilježavanja sedamnaeste godišnjice djelovanja Fondacije Hastor, kako je posebno naglašeno i na samom događaju, ogleda se i u 125 društveno korisnih projekata koje su naši stipendisti, učenici osnovnih i srednjih škola pod mentorskom palicom studenata stipendista, realizovali u povodu obilježavanja Svjetskog dana činjenja dobrih djela, a potaknuti upravo željom za nesebičnim doprinosom svojim lokalnim zajednicama predstavljajući svijetle primjere bosanskohercegovačkog društva.

Nizom aktivnosti i prisjećanjem na postignute rezultate u proteklim godinama, pokazali smo da smo podrškom u obrazovnom procesu, kroz kontinuiranu finansijsku i mentorsku podršku, bili čvrsti oslonac bosanskohercegovačkoj omladini, učinivši njihov put ka uspjehu lakšim i potvrđujući iz godine u godinu da je Obrazovanje – izbor pobjednika!



➤ Svjetski dan činjenja dobrih djela u Fondaciji Hastor



U aprilu ove godine je više od 2.000 stipendista Fondacije Hastor realizovalo 125 različitih društveno korisnih projekata u svojim lokalnim zajednicama u povodu obilježavanja Svjetskog dana činjenja dobrih djela. Duh Fondacije Hastor osjetio se u cijeloj Bosni i Hercegovini, od Krajine, putem središnje Bosne pa sve do suncem okupane Hercegovine, pokazujući istinsku snagu koju pokreće velika porodica mladih ljudi, spremnih da svojim primjerom djeluju na mijenjanje svijesti našeg društva. Cilj svih ovih akcija bio je izgrađivati osjećaj za njegovanje humanosti, empatije i ljubaznosti kod naših stipendista te pokazati da su jedinstvo, nesebično zalaganje i pružanje jednakih prilika za sve ključne stavke izgradnje bolje budućnosti. Naši stipendisti su kroz implementaciju projekata realizovali akcije različitog karaktera, od akcija pomoći stanovništvu u stanju socijalne potrebe, preko projekata inkluzije djece sa poteškoćama u razvoju i djece bez roditeljskog staranja do ekoloških akcija, a nisu zaboravili ni na napuštene životinje.

Priče i dobra djela koje svakodnevno naši stipendisti realizuju i šire svjedoče da Bosna i Hercegovina ima čvrste temelje izgrađene na dobročinstvu, jer naši stipendisti su zaista prepoznatljiviji mladi ljudi koji pomažu drugima, čine dobro i prenose misiju i vrijednosti Fondacije Hastor.

Proljeće 2023. godine u Fondaciji Hastor zaista je bilo produktivno i inspirativno za sve njene stipendiste, a svim našim aktivnostima uspjeli smo ispisati možda do sad i najljepše stranice naših knjiga dobrih djela.



Ekološke akcije

**Inkluzija djece s teškoćama u razvoju
i djece bez roditeljskog staranja**

Edukativne radionice

**Akcije pomoći stanovništvu
u stanju socijalne potrebe**

➤ Održan konkurs i uručene diplome i nagrade za najbolje literarne radove o temi *Kako je Fondacija Hastor promijenila moj život*

Povodom obilježavanja sedamnaeste godišnjice Fondacije Hastor organizovali smo i takmičenje za najbolji literarni rad na temu ***Kako je Fondacija Hastor promijenila moj život***, na koje je pristigao veliki broj kreativnih i originalnih radova, koji su posvjedočili da se Fondacija Hastor zaista može ponositi talentima u okviru svoje porodice. Radovi su bili ispunjeni emocijama i istinskim porukama naših stipendista i dokazali ljubav i privrženost Fondaciji. Pravo učešća na konkursu imali su svi studenti stipendisti Fondacije Hastor, a radovi su se mogli pisati u svim oblicima proze i poezije.

Na literarni konkurs prijavio se veliki broj studenata stipendista, a stručni žiri za izbor najboljih literarnih radova imao je nimalo lagan zadatak. Iz mase radova protkanih čistim emocijama, izrazima ljubavi, poštovanja, zajedništva i zahvalnosti – izabrani su oni najbolji. Da našim stipendistima ne nedostaje riječi kojima nas iznova podsjećaju na našu misiju pomaganja i činjenja dobra svjedoče njihove pisane riječi koje su stigle do nas.

Na zajedničkom druženju studenata stipendista Fondacije Hastor upriličeno je i svečano proglašenje najboljih radova. Prvo mjesto na literarnom konkursu osvojila je naša stipendistica **Almina Šabanović-Kokot**, a nagrada koja joj je uručena je električni romobil marke Ninebot KickScooter. Drugo mjesto osvojila je stipendistica **Nedžma Latić**, a uručena nagrada je mobilni telefon marke Xiaomi Redmi 10c. Treće mjesto osvojila je stipendistica **Aida Suljić**, a njoj je uručena nagrada TESLA LED televizor.



➤ **ASA Bolnica i ASA Gradnja zajedno s Fondacijom Hastor organizovale i nagradile pobjednike povodom Konkursa za najbolje likovne radove stipendista Fondacije Hastor**

Nakon što smo u aprilu, povodom sedamnaeste godišnjice postojanja Fondacije Hastor, organizovali literarni konkurs i uručili vrijedne nagrade, nedugo poslije, u saradnji s ASA Gradnjom i ASA Bolnicom odlučili smo obradovati i novu grupu stipendista, onu koja ima dar za likovne radove. Tako smo se u proteklom periodu još jednom uvjerali koliko su naši stipendisti vrijedni, talentovani i maštoviti.

Pravo učešća imali su svi stipendisti Fondacije Hastor. Devet vrijednih nagrada ravnomjerno je podijeljeno na stipendiste koji su učenici osnovnih i srednjih škola, ali i stipendiste koji su u statusu studenata. Stipendisti su svoju kreativnost mogli predložiti u bilo kojoj tehnici i na taj način ukazati na jedinstvenost svog umjetničkog rada. Još jedna olakšica bio je slobodan izbor teme kako bismo stipendistima pružili priliku da svoje emocije iznesu kako najbolje znaju bez bilo kakvih ograničenja u njihovom likovnom izražaju. Iako s punim pravom možemo reći da su u svaki rad bile utkane posebne emocije, nijanse su presudile da komisija nagradi određenu grupu vrijednih i kreativnih stipendista.

U kategoriji studenata prvo mjesto osvojila je **Edna Đuliman** (Fakultet informacijskih tehnologija Mostar, 2. godina), drugo mjesto pripalo je **Salehi Redžepi** (Medicinski fakultet Sarajevo, 6. godina), a treće mjesto je zauzela **Nejla Dedić** (Fakultet umjetnosti i društvenih nauka Sarajevo, 2. godina).

U kategoriji srednjoškolaca nagradu za najbolji rad osvojila je **Lamija Tokić** (Gimnazija „Vaso Pelagić“ Brčko, 2. razred), drugo mjesto je zauzela **Selma Salkić** (Srednjoškolski centar „Petar Kočić“ Zvornik, 1. razred), dok je treće mjesto osvojila **Medina Baraković** (Gimnazija „Dr. Mustafa Kamarić“ Gračanica, 2. razred).

Prvo mjesto u kategoriji učenika osnovnih škola osvojila je **Naida Omerović** (OŠ „Parsovići“ Konjic, 9. razred), drugo mjesto pripalo je **Lejli Omerović** (Prva osnovna škola Srebrenica, 8. razred), a treće mjesto je zauzela **Almina Mumić** (OŠ „Gornji Rainci“ Kalesija, 8. razred).

Nagrade za dobitnike u svim kategorijama iznosile su: 300,00 KM za osvojeno prvo mjesto, 200,00 KM za osvojeno drugo mjesto i 100,00 KM za osvojeno treće mjesto.

Na kraju vrijedi istaknuti to koliko smo ponosni na sve pristigle likovne radove svih naših stipendista koji su kroz sliku pokazali svoj doživljaj svijeta i koji su nas svojom kreativnošću uveli u čudesne krajolike njihove mašte. Njihovi radovi krasit će zidove ASA Bolnice u Sarajevu i vjerujemo da će i na druge ostavljati snažne dojmove i slati im važne poruke. Ovu priliku koristimo da se zahvalimo ASA Gradnji i ASA Bolnici na vrijednim nagradama koje su obezbijedili pobjednicima te na pruženoj mogućnosti da naši stipendisti iskažu svoje talente.




Pobjednički radovi u kategoriji Studenti



1. Edna Đuliman



2. Saleha Redžepi



3. Nejla Dedić


Pobjednički radovi u kategoriji Srednja škola



1. Lamija Tokić



2. Selma Salkić



3. Medina Baraković


Pobjednički radovi u kategoriji Osnovna škola



1. Naida Omerović



2. Lejla Omerović



3. Almina Mumić

> Održana Osnivačka skupština Alumni kluba Fondacije Hastor



U subotu, 16.09.2023. godine održali smo Osnivačku skupštinu Alumni kluba Fondacije Hastor, gdje su se na jednom mjestu okupile brojne generacije izuzetno uspješnih mladih ljudi.

Za Fondaciju Hastor ova godina je izuzetno produktivna, obojena novim idejama, projektima i novim počecima, među kojima se našao i čin svečanog osnivanja Alumni kluba Fondacije Hastor.

Druženje je održano simbolično na datum na koji je prije 17 godina potpisan prvi ugovor o stipendiranju s prvim stipendistom Fondacije Hastor. Prvim ugovorom je postavljen kamen temeljac tvrđavi dobra, humanosti, podrške i ljubavi, a svako od stipendista je kroz sve ove godine u toj tvrđavi nesebično ostavljao svoje niti da bi ona danas bila ono što jeste. Dosadašnji uspješan rad

koji stoji iza imena Fondacije Hastor posebno se potvrđuje impresivnim brojkama hiljada mladih ljudi, bivših i trenutnih stipendista, kojima je Fondacija olakšala školovanje, pružajući svima jednake prilike za napredak i izgradnju ličnosti u svrhu pokretanja pozitivnih promjena u našem društvu i našoj jedinoj Bosni i Hercegovini.

Na održanoj Osnivačkoj skupštini izabrano je prvo rukovodstvo Alumni kluba Fondacije Hastor, i to u sljedećem sastavu: **Marizela Hadžić** (predsjednica Skupštine), **Emina Sijahović** (potpredsjednica) i **Alem Merdić** (sekretar), koji predstavljaju svijetli primjer alumnista Fondacije Hastor koji su svoje resurse i po završetku stipendiranja stavili na raspolaganje, u cilju unapređenja rada Fondacije za sve mlade generacije koje su sada, a i za one koje će postati njeni stipendisti.

S druženja je poslata poruka zajedništva, jedinstva i duboke povezanosti svih bivših stipendista, a povodom osnivanja Alumni kluba, čestitke rukovodstvu i članovima su uputili i osnivači Fondacije Hastor te im poručili:



“Svjetlo dobrote se ne gasi nikada ako svoj plamen dijelimo s drugima. Kao jedna iskra koja se širi kroz tamne trenutke, naša plemenitost može donijeti toplinu i nadu onima kojima nedostaje. Kroz naša djela ljubaznosti i saosjećanja, možemo osvjetliti put drugima i pokazati im da je svijet pun ljepote, solidarnosti i mogućnosti. Svaka mala inspiracija koju pružimo drugima može pokrenuti lanac pozitivnih promjena koji će se nastaviti kroz vrijeme. Dakle, neka se naše svjetlo ne gasi, već neka bude vodilja koja pokreće druge da se pridruže u stvaranju svijeta ispunjenog dobrotom i razumijevanjem. Tako ćemo zajedno ostaviti naslijeđe koje zrači ljepotom i nadom za buduće generacije.”

➤ Pokrenut Podcast Fondacije Hastor

U toku ove godine pokrenuli smo Podcast Fondacije Hastor, kao jedan od najboljih alata za promociju pozitivnih ljudskih vrijednosti i uspješnih mladih ljudi koji će svojim životnim pričama, idejama poslužiti i kao motivacija mladim ljudima, ali i cijelom bosanskohercegovačkom društvu kojem su itekako potrebni pozitivni primjeri i pozitivni rezultati. Budući da u Fondaciji Hastor postoji zaista mnogo takvih primjera i priča, odlučili smo da sve to realizujemo kroz trenutno najpopularniji medij – **podcast**.

Kroz priče naših trenutnih i bivših stipendista nastojimo pružiti inspiraciju i motivaciju mladima koji se nalaze pred velikim životnim izazovima, u nadi da će im inspirativne priče naših gostiju biti dodatna podrška i pružiti putokaz u njihovom daljem razvoju.

U prvoj sezoni podcasta ugostili smo brojne uspješne mlade ljude, stipendiste i alumniste Fondacije Hastor, koji su ostvareni u različitim oblastima te je kroz razgovor s njima obrađeno mnogo korisnih i zanimljivih tema te pozitivnih i inspirativnih priča, koje mogu poslužiti kao pomoć mladima u procesu sazrijevanja, napretka i pronalaska prilika za volontiranje, studentske angažmane, prakse, zaposlenje i sl.

Kako najveća pokretačka snaga Fondacije Hastor leži u njenim trenutnim i bivšim stipendistima, podcast je realizovan upravo zahvaljujući toj snazi, koja je zajednički učestvovala u osmišljavanju, planiranju i realizaciji podcasta, a u ulozi voditeljica su se našle upravo vrijedne stipendistice Fondacije Hastor Dženana Zulum, studentica Fakulteta političkih nauka Univeziteta u Sarajevu i Amina Zorlak, studentica Medicinskog fakulteta Univerziteta u Sarajevu.



> Početak implementacije novog modela volontiranja

Nastojeći što više pomoći i olakšati svojim stipendistima i oslušujući njihove potrebe i ideje, u prethodnom periodu aktivno smo radili na kreiranju novog modela volontiranja u Fondaciji Hastor. Novi model volontiranja, čija je implementacija započela u septembru, osim novim volonterskim aktivnostima, je dodatno obogaćen i specijaliziranim klubovima. Na ovaj način rada naši stipendisti, učenici osnovnih i srednjih škola, će imati višestruku korist. Na volonterskim sastancima sa svojim mentorima imat će priliku da usvajaju znanja i vještine koje će im biti korisne u svakodnevnom životu, u toku zajedničkih volonterskih akcija sa svojim mentorima će od malih nogu biti motivisani da čine dobra djela, šire lijepe ljudske vrijednosti i imat će imati priliku da čine korisne stvari u svojoj lokalnoj zajednici, a priliku da prodube znanje iz školskih predmeta i budu što uspješniji u školi imat će kroz specijalizirane klubove za različite predmete i oblasti. Glavni zadatak ovih klubova bit će da pruže inkluzivne radionice i časove učenicima stipendistima koji imaju poteškoća s nekim školskim predmetima, a oni koji su posebno nadareni i talentovani za određene oblasti imat će priliku dodatno razvijati svoje vještine radeći sa stipendistima mentorima koji će voditi naše specijalizirane klubove.

U cilju još značajnijeg unapređenja i poboljšanja ovog tipa volonterskog angažmana stipendista, Fondacija Hastor je u saradnji s brojnim stručnjacima iz različitih područja, organizirala obuku studentima koji će tokom naredne akademske godine biti zaduženi za unapređenje volonterskog angažmana studenata mentora i imat će ulogu mentora koordinatora. Obuku za mentore koordinate su održali stručnjaci iz oblasti psihologije, pedagogije, edukacije i rehabilitacije, čime su se nastojale obuhvatiti sve važnije grane nauka koje su specijalizirane za rad s djecom osnovnoškolskog i srednjoškolskog uzrasta. Zadatak mentora koordinatora je da stečena znanja prenesu na ostale mentore te da budu podrška u svakom trenutku njihovog mentorskog procesa, čime želimo obezbijediti da svaki sat proveden u radu i volontiranju s našim stipendistima bude što kvalitetniji, svrsishodniji i ostavi značajan trag na razvoj svih naših stipendista.



Ovim modelom volontiranja želimo još više pomoći učenicima da razvijaju svoju ličnost, rade na sebi, da kreiraju svoje snove i prepoznaju svoje vještine kako bi u budućnosti postali samosvjesniji odgovorniji članovi bosanskohercegovačkog društva. Novi model volontiranja nije samo značajan korak za Fondaciju Hastor, njen rad i misiju, to je izuzetno važan korak i ka kreiranju bolje i perspektivnije budućnosti naše zemlje, što nas posebno raduje i motiviše da nastavimo raditi na obrazovanju i unapređenju vještina i znanja budućih generacija.

> Ljetni raspust u Holandiji 2023.

Fondacija Hastor se pored mnoštva uspješnih projekata može pohvaliti i projektom „Ljetni raspust u Holandiji“ koji s posebnim zadovoljstvom realizuje svake godine u saradnji s holandskom organizacijom „Stichting Kinderhulp Bosnië“. Ideja projekta je pružiti priliku djeci iz ruralnih područja i s lošim socio-ekonomskim statusom priliku da posjete Holandiju, sklope životna prijateljstva i steknu iskustva za pamćenje. U tekućoj godini projekt je realizovan u junu i priliku za posjetiti predivnu zemlju tulipana dobilo je 28 djece iz Kaćuna pored Busovače, Opare pored Novog Travnika i Novog Travnika.

Naši stipendisti svake godine učestvuju u ovom projektu kao pratnja učenicima koji putuju na svoj ljetni raspust, pomažući im u komunikaciji s roditeljima od kojih su razdvojeni te predstavljaju izuzetnu pomoć u organizaciji i realizaciji radionica za učenike. S obzirom na to da je stigao veliki broj prijava, administracija Fondacije Hastor imala je težak zadatak da izabere one studentice koje će putovati u Holandiju. Nakon pažljivog odabira smo pokloniti povjerenje svojim studenticama stipendisticama Amili Glamočak i Edni Porči, koje su oduševljeno preuzele ulogu pratnje našim malim putnicima.

Dani provedeni u zemlji tulipana bili su jako zanimljivi djeci, ali i našim stipendisticama Amili i Edni. Zadovoljstvo nam je što svake godine imamo priliku usrećiti mnoštvo djece i prirediti im nezaboravna iskustva koja će krasiti listove njihovog djetinjstva.



Amila i Edna su se posebno zahvalile Fondaciji Hastor na ovoj prilici, ali i predivnim članovima „Stichting Kinderhulp Bosnië“ organizacije koji su marljivo radili s ciljem da pomognu djeci i samim tim im pokazali snagu i važnost zajednice i omogućili im da budu dio nezaboravnog iskustva za djecu iz Bosne i Hercegovine. Ističu kako su na ovom putovanju stekle mnoge vještine i upoznale novu kulturu, a uz to su imale priliku gledati sretna lica mlađih stipendista i diviti se dječijoj radosti zbog putovanja i novostečenog iskustva, što ih je, kako kažu, posebno ispunilo. Istaknule su kako su ovim putovanjem po ko zna koji put uvidjele da je Fondacija Hastor doprinijela dječijoj sreći koju će bez sumnje pamtit i zauvijek. Ponosni smo na naše stipendistice koje su svojom pažnjom i odgovornošću doprinijele da i ove godine projekt „Ljetni raspust u Holandiji“ bude nezaboravno iskustvo za 28 djece koji su iz Holandije ponijeli samo najljepše uspomene i prijateljstva.

● USPJESI STIPENDISTA



Sportski uspjesi našeg stipendiste Amara Mehanovića

Svestranost je osobina koja krasi mnoge stipendiste i na koju je Fondacija iznimno ponosna. Amar Mehanović je stipendista iz Caparda koji već dvije godine zaredom postiže zapažene rezultate sa svojim fudbalskim klubom „Memići“. Amar trenutno ide u drugi razred Mješovite srednje škole u Kalesiji. Fudbal trenira od svoje sedme godine, a 2021. i 2022. godine proglašen je za najboljeg fudbalera općine Kalesija. Fondacija za Amara predstavlja nadu i mogućnost da se izgradi u svakom smislu te inspiraciju da svakodnevno radi na pomjeranju vlastitih granica. Kako on kaže, Fondacija svojim stipendistima pomaže da ostvare cilj koji su zacrtali te im kroz razne aktivnosti omogućava da sazrijevaju i dobijaju lijepu i kvalitetnu podlogu za budućnost.

“

Svojom trudom i vjerovanjem u samog sebe postigao sam mnoge i značajne uspjehe. Fudbal kao fudbal za mene predstavlja nešto jedinstveno. Moram priznati da uistinu

uživam u svakom trenutku kada sam na terenu. Kada sam postao stipendista Fondacije Hastor znao sam da nešto novo dolazi u moj život. Naučio sam prije svega kako biti koristan svojoj zajednici, ali i društvu. Obogatio sam svoj vokabular i postao komunikativnija osoba. Trudim se iz dana u dan da budem sve bolji kako bih sebe pripremio za ono što me čeka u budućnosti, a Fondaciji Hastor, koja mi u tome značajno pomaže, neizmjereno sam zahvalan.



Umjetnički putevi naše stipendistice Lamije Šišić

Četnaestogodišnja Lamija Šišić je stipendistica koja nas iznova i iznova čini ponosnim zbog svog rada i uspjeha koje niže. Trenutno je osmi razred osnovne škole i peti razred osnovne muzičke škole. Pored časova violine i solfeđa, Lamija učestvuje i u vježbama s orkestrom, a odlična je i u slikarstvu pa se odvažila i na pohađanje škole slikanja i likovne kolonije. Državna je prvakinja violine u klasičnoj muzici. Kao mlad talent Bosne i Hercegovine svirala je sa simfonijskim orkestrom Mostar. Učesnica je mnogih festivala i solističkih koncerata humanitarnog karaktera, a u svrhu promovisanja umjetnosti. Ističe kako joj je jedan od najdražih nastupa prošlogodišnji koncert klasične muzike humanitarnog karaktera koji je održala sa svojom sestrom u Bosanskom kulturnom centru u Sarajevu u mjesecu maju u spomen i čast nevino stradale djece Kantona Sarajevo. Ovo nije jedini čin iskazivanja humanosti i njegovanja pravih vrijednosti naše stipendistice – Lamija je nedavno donirala i svoju kosu za djecu oboljelu od raka

pokazujući zrelost i spremnost da solidariše s drugima i da prepoznaje tuđe brige i probleme. Sve te vrijednosti usađene su u srž postojanja Fondacije Hastor i više smo nego ponosni što ih naši stipendisti u svakoj prilici prenose i pokazuju. Lamija o Fondaciji Hastor kao važnom dijelu njenog obrazovnog puta kaže:

“

Jako sam zahvalna Fondaciji na svemu što su učinili za mene i željno čekam prvu priliku u kojoj ću posjetiti Fondaciju i upoznati mnogo divnih i inspirativnih ljudi. Već sada osjećam koliko sve ono na šta nas podsjećaju u ovoj zajednici pozitivno utječe na mene.



Inspirativni i zavidljivi put uspjeha naše karatistkinje Ajle Kahrić

Ajla je učenica osnovne škole s besprijekornim ocjenama i izvanrednim dostignućima u sportskim aktivnostima. Isprva se počela baviti folklorom, već u petoj godini, ali je njenu pažnju ubrzo zaokupio sport koji joj danas predstavlja najveću radost i donosi veliko zadovoljstvo – karate. Njeno prvo takmičenje se desilo 2019. godine, a samo dvije godine kasnije, 2021. godine izborila je učešće na državnom prvenstvu, zahvaljujući plasmanu ostvarenom na federalnom prvenstvu, nakon čega su uslijedila brojna važna takmičenja, među kojima se izdvaja Balkansko prvenstvo.

Njen put uspjeha se nastavlja te je uskoro ostvarila plasmane na mnoga značajna takmičenja, među kojima ističe jedan od najprestižnijih turnira na Balkanu – Ilidža Open, gdje je osvojila zlatnu medalju na koju je posebno ponosna, kao i na sjajne rezultate postignute u toku ove godine: zlatna medalja na Balkanskom prvenstvu u Sarajevu,

treće mjesto na Državnom prvenstvu itd. Sve medalje i nagrade koje je Ajla osvojila u iznimno kratkom periodu bilo bi teško i prebrojati, pa onda samo možemo zamisliti koliko je žrtvovanja, truda i discipline iziskivao njen put do ovih uspjeha. Ajla je zaista najbolja među najboljima.

Za kraj smo zabilježili još jednu rečenicu naše sagovornice gdje naglašava značaj Fondacije Hastor u njenom životu:



Zahvaljujući Fondaciji stekla sam nova prijateljstva i uz pomoć stipendije sama sebi plaćam članarinu za sport i takmičenja ako ih imam u tom mjesecu.



Takmičarski uspjesi Amera Šabića

Da je naša Fondacija riznica mladih talenata posvećenih nauci, volontiranju, ali i brojnim vannastavnim aktivnostima, dokazuje i naš devetnaestogodišnji stipendista Amer Šabić koji dolazi iz Ključa. Završio je Mješovitu srednju školu "Profesor Omer Filipović" u Ključu. Amer Šabić je na školskom takmičenju iz matematike osvojio prvo mjesto, na istom nivou postigao je prvo mjesto i iz fizike nakon čega se plasirao na kantonalno takmičenje (oblast A – mehanika i termodinamika), gdje također osvaja prvo mjesto. Njegov put uspjeha nastavlja se učešćem na federalnom takmičenju iz fizike. Osim navedenog ističe i osvojeno prvo mjesto na školskom takmičenju iz informatike te prvo mjesto na kantonalnom takmičenju iz istog predmeta. Za to koliko je važna uloga mentora za sve naše stipendiste, Amer je najbolji dokaz!



Talent i ljubav prema predmetima kao što su matematika, fizika i informatika otkrio sam još u osnovnoj školi kad sam se počeo takmičiti i već od 6. razreda postizao sam značajne rezultate iz ovih predmeta. Spremao sam se uz pomoć svojih mentora koji su dobrim dijelom zaslužni za moje uspjehe. Sretan sam što sam jedan od njenih stipendista i volim provoditi vrijeme na sastancima, gdje smo obradili i još uvijek obrađujemo mnogo interesantnih tema iz kojih sam dosta naučio.



Neđada Ramić - atletska prvakinja u raznim disciplinama

Naši stipendisti iz dana u dan pokazuju izvanredne napretke i postižu visoke ciljeve pod okriljem Fondacije Hastor. Jasan indikator izuzetne ambicioznosti uočava se i u uspjehu mlade stipendistice Neđade Ramić, studentice Fakulteta zdravstvenih studija Univerziteta u Sarajevu, smjer Fizioterapija. Kako ističe Neđada, atletika je oduvijek bila njena prvotna ljubav, još od djetinjstva bila je prepoznatljiva po svojoj energičnosti. Unatoč određenim izazovima, Neđada je s velikom dozom entuzijazma ostvarila svoje snove. Već u prvom razredu srednje škole pokazala je nevjerovatnu samostalnost i hrabrost kada se odlučila takmičiti i kada je osvojila treće mjesto, što joj je omogućilo prolazak u finale. Nastavila je svoj put i ponosno osvojila bronzanu medalju. Svoju karijeru započela je ostvarivanjem svojih prvih snova, stvarajući temelje za nove kao članica kluba AK Sarajevo. Postala je prvakinja na 400 metara, 800 metara, krosu, štafetama 4x400 metara i 4x100 metara, višeboju, gdje je bila seniorska prvakinja dvije

godine zaredom, te na mnogim međunarodnim takmičenjima.

“

Atletika mi je pomogla da razvijem svoj karakter, da unaprijedim svoje fizičke sposobnosti i da naučim da se najveća bitka vodi u glavi, i to je bitka čovjeka sa samim sobom. Kroz sport sam se zainteresirala za izučavanje povreda i rehabilitaciju, zbog čega sam i upisala smjer Fizioterapija. Fondacija Hastor je kroz čitavo moje školovanje bila uz mene. Stipendistica Fondacije Hastor sam jedanaest godina i najviše sam zahvalna na podršci i dodatnoj motivaciji za postizanje što boljih rezultata kako na akademskom polju tako i van njega. Uz volontiranje sam stekla i mnogo znanja i vještina te mnoge prijatelje i mentore/ice koji će mi uvijek ostati u sjećanju. Fondacija Hastor mi je otvorila mnoga vrata, pomogla mi da konstantno evolviram, i kao učenica koja uči i kao čovjek koji svakodnevno teži ka tome da bude bolji, i na tome sam neizmjenjivo zahvalna.



Amin Lulić – dječak iz svijeta informatičkih čuda

Dječaćki snovi imaju ogromnu vrijednost ako odrastanje prate trud i želja za njihovim ostvarenjem. Fondacija Hastor svakodnevno podstiče svoje stipendiste da slijede svoje snove i streme njihovom ostvarenju. Jedan od njih je i četrnaestogodišnji Amin Lulić koji dolazi iz Cazina. Pored redovnog učenja i izvršavanja školskih obaveza, Amin svoje slobodno vrijeme voli provoditi programirajući. Učestvovao je na takmičenjima iz matematike, fizike i informatike. U protekloj školskoj godini je na školskim takmičenjima iz navedenih predmeta osvojio prvo mjesto. Iako voli provoditi vrijeme uz zadatke iz fizike i matematike, posebnost njegovog odnosa s informatikom pokazala se i na takmičenjima. Naime, na općinskom takmičenju iz informatike osvojio je prvo mjesto i tako još jednom pokazao privrženost svojim ciljevima koje je već zacrtao iako je tek učenik osnovne škole.

“

Budući da su moja oba roditelja nezaposlena, Fondacija Hastor pomaže i njima i meni kroz finansiranje mog školovanja. Ona mi daje bezgraničnu motivaciju da još više učim i napredujem u onome što volim. Fondacija svojim stipendistima pokazuje prave vrijednosti koje ja pokušavam izgraditi kod sebe i tako ih predstaviti svijetu na vlastitom primjeru.

U daljoj budućnosti Amin planira studirati na Fakultetu informacijskih tehnologija na kojem će, kako ističe, nastojati istražiti dubine programiranja i steći što više vještina kako bi ih kasnije mogao primijeniti u svom radu. U ovim godinama želi postaviti dobre temelje za znanje koje tek treba steći. Svojim uspjesima želi da se oduži roditeljima i Fondaciji za svu podršku koju mu pružaju.



Hamza Turulja - jedan od najboljih mladih sportista u Bosni i Hercegovini

Bosna i Hercegovina se može pohvaliti mnogobrojnim sportskim talentima koji svojim uspjesima pokazuju da i male zemlje mogu biti nepresušan izvor iznimno uspješnih sportista. Jedan od najboljih mladih sportista u Bosni i Hercegovini je upravo naš stipendista Hamza Turulja koji je svoje uspjehe već odavno počeo nizati u domenu bosanskohercegovačkog karatea.

Hamza je student treće godine Fakulteta za sport i tjelesni odgoj u Sarajevu, a posljednjih godina svoju energiju usmjerio je na karate, sport koji ga, kako kaže, ispunjava na poseban način. Trenutno je nosilac majstorskog zvanja crni pojas treći dan, reprezentativac je Bosne i Hercegovine i sedmerostruki državni prvak u borbama. Osim toga, Hamza je i osvajač srebrne medalje na Svjetskom prvenstvu do 21. godine u čileanskom Santiagu 2019. godine i srebrne medalje

na Svjetskoj ligi mladih u juniorskoj konkurenciji. Dobitnik je brojnih priznanja, a 2019. godine izabran je za najboljeg mladog sportistu Bosne i Hercegovine. Kaže da na svom akademskom i sportskom putu uz sebe ima Fondaciju Hastor koja ga svakodnevno bodri. Ističe kako mu je jako važna ova zajednica uspješnih mladih ljudi jer u njoj nalazi inspiraciju da i sam svakodnevno radi na tome da bude uspješan i da dosegne najbolju verziju sebe. Ova godina bila je najuspješnija u njegovoj sportskoj karijeri jer je osvojio treće mjesto na Mediteranskim igrama u Alžiru, drugo mjesto na Svjetskim univerzitetskim igrama u Turskoj, prvo mjesto na Svjetskoj seriji A u Indoneziji te peto mjesto na Evropskom prvenstvu.

“

Svi ovi rezultati ne bi bili mogući bez pomoći i podrške. Uz moju najveću podršku, roditelje i trenere te pojedine institucije, izdvojio bih moju Fondaciju Hastor. S obzirom na to da sva ova takmičenja zahtijevaju zaista mnogo novca, a država, nažalost, sportiste ne podržava dovoljno, stipendija Fondacije Hastor mi je bila velika i značajna pomoć u finansiranju putovanja i takmičenja. Naravno, ta podrška nije samo finansijska, Fondacija Hastor je bila uvijek tu da pomogne, podrži, ohrabri i udijeli korisne savjete. S obzirom na to da sam i prije dolaska u Fondaciju Hastor volio volontiranje i da sam volontirao u migrantskom dječijem kampu, učestvovao na reviji za inkluziju djece i osoba s invaliditetom te organizaciji sportskih događaja, kroz Fondaciju sam nastavio s činjenjem dobra, dobio određeni kontinuitet i nastavio sebe stalno podsjećati koliko je zaista važno pomagati drugima. Također bih izdvojio činjenicu da sam kroz Fondaciju upoznao toliko divnih mladih i uspješnih ljudi pa mogu reći da smo zaista jedna velika porodica u pravom smislu te riječi, navodi Hamza.



VANNASTAVNE AKTIVNOSTI STIPENDISTA FONDACIJE HASTOR

Aleksandra Đukić

Aleksandra Đukić je stipendistica Fondacije Hastor od februara 2021. godine i mnogo slobodnog vremena posvećuje neformalnom obrazovanju. Ima zvanje republičkog odbojkaškog sudije i često sudi na odbojkaškim utakmicama koje su joj, kako ističe, u mnogome pomogle da izgradi samopouzdanje.

U okviru nevladine organizacije „Humanity in Action“ imala je niz aktivnosti koje su bile volonterskog karaktera. O mjestu i ulozi volontiranja u njenom svakodnevnom životu Aleksandra je istakla sljedeće:

Volontiranje me emotivno ispunjava jer znam da dajem mali dio sebe koji drugima puno znači. Smatram da svojim aktivizmom i društvenim angažmanom pomažem cijelom bosanskohercegovačkom društvu, pokazujem da mi je stalo do zemlje u kojoj sam rođena i da ne želim da idem iz nje nego da aktivno učestvujem u izgradnji kvalitetnije države koja će dočekati neke nove generacije mladih. Fondacija Hastor je aktivno uz mene više od godinu dana, a sve vrijeme, na nju gledam kao na jedan vid oslonca koji mi je bio potreban na mom akademskom putu. Kada su mi se mnoga vrata zatvorila, Fondacija Hastor mi je otvorila vrata i pomogla, ne samo u finansijskom smislu nego i kroz podršku koju svakodnevno osjećam. Stekla sam poznanstva s drugim mladim ljudima koji imaju ista ili slična interesovanja kao ja i upravo ta poznanstava smatram izuzetno značajnim i čvrsto vjerujem da će ostati i nakon okončanja mog formalnog obrazovanja.



Emrah Tepić

Poduzetnost, angažiranost, spremnost za rad i posvećenost volonterskim aktivnostima samo su neke od vrlina koje posjeduju naši stipendisti. Dokaz za sve spomenuto je dugogodišnji stipendista Emrah Tepić. S obzirom na to da od rođenja ima potpuno oštećenje vida, stalno se suočavao s raznim oblicima diskriminacije i predrasuda. Uprkos tome, nikada nije klonuo duhom i uvijek je išao za svojom srećom, a trenutno je student master studija na Fakultetu političkih nauka.

Naš stipendista Emrah je prošao težak razvojni put, djelomično i zbog ustaljene percepcije društva i brojnih predrasuda s kojim se suočavao tokom svog obrazovanja. Međutim, Emrah je svoj oslonac i veliku podršku pronašao u Fondaciji Hastor, čiji je stipendista više od šest godina. Fondacija Hastor za njega predstavlja izuzetno važan dio života jer je uvijek bila tu kako za njega tako i za njegovu porodicu.



Fondaciju Hastor vidim kao jednu veliku porodicu i drugu kuću. Ona je odigrala veliku ulogu u mom životu. Zahvaljujući Fondaciji Hastor moje samopouzdanje se poboljšalo i dobio sam optimističan pogled na život. Ovim putem se zahvaljujem našoj Fondaciji Hastor što uspijeva da od nas napravi pobjednike, velike i uspješne ljude. Ona je uvijek tu za nas i prati nas kroz cijeli naš život, kazao je Emrah.

Emrah ističe da se kroz koncept Fondacije Hastor zapravo istinski i upoznao s volontiranjem te da su mu ti volonterski sati bili odskočna daska za dalje volontiranje, stoga je postao član i drugih udruženja poput Udruženja slijepih Kantona Sarajevo, Udruženja „Dajte nam šansu“, Udruženja „Samostalan korak“ te Ureda za podršku studentima Univerziteta u Sarajevu. Emrah je čvrsto odlučio da svoj život posveti tome da za druge čini najbolje što može i sretan je što je dio velike porodice – Fondacije Hastor.

Aida Mujčin

Aida dolazi iz Sarajeva i studentica je četvrte godine Medicinskog fakulteta na SSST Univerzitetu. Pored ljubavi prema nauci i medicini, voli umjetnost i fotografiju i studentica je treće godine Odsjeka za grafički dizajn i multimediju na Internacionalnom Burch Univerzitetu. Iako su nauka i umjetnost dvije različite oblasti, u stanju je održati ravnotežu i ostati otvorena za nove životne izazove. Na funkciji je predsjednice asocijacije MEDICA, a od aktivnosti posebno izdvaja humanitarne akcije i edukativne seminare te naučno-istraživačku konferenciju SSST Med ReCon.

Uživa u fotografisanju i bavi se tim već dugi niz godina. Pored fakulteta i članstva u Fondaciji Hastor, pokrenula je svoj mali biznis i bavi se fotografisanjem vjenčanja i raznih događaja, igra odbojku i čita knjige, a najviše voli provoditi vrijeme s porodicom.



Za sebe bih rekla da sam odgovorna, istrajna i vesela osoba. Moja ljubav prema volontiranju datira još od osnovne škole, kao djetetu mi je najdraža stvar na svijetu bila akreditacija volontera koju sam uvijek ponosno i odgovorno nosila. Sada, godinama kasnije, pripala mi je čast biti nekome uzor i pozitivan vjetar u leđa. U Fondaciji Hastor pronašla sam najveći izvor motivacije za volontiranje. U početku sam volontirala sa stipendistima osnovcima i cilj mi je bio da sa svakog zajedničkog druženja izađu bogatiji za nešto, bilo da je to znanje, vještine ili kritičko razmišljanje. Sada sam u timu za grafički dizajn i presretna sam jer radim ono što volim i mogu ispoljiti svoju kreativnost i realizirati zamisao.

Ističe kako su prilike koje Fondacija Hastor nudi mladim ljudima nesvakidašnje i zasigurno su mali koraci ka velikoj i boljoj budućnosti svih nas. Aida smatra da nam Fondacija Hastor pruža i priliku da pozitivno djelujemo na svoju zajednicu. Sama ideja Fondacije kojom se ambiciozni mladi ljudi podstiču da naprave promjenu uvijek je bila i ostat će, kako kaže, jako značajna za nju.

Omer Muminović

Omer Muminović dolazi iz Teočaka, a stipendista Fondacije Hastor je već dvije godine. Završio je Behram-begovu medresu u Tuzli odličnim uspjehom nakon čega je upisao Odsjek za ekonomiju i međunarodno poslovanje na Univerzitetu Sarajevo School of Science and Technology (SSST). U slobodno vrijeme uživa u čitanju, pisanju i odlasku u prirodu, a kada mu obaveze dozvole, voli pogledati novu epizodu kviza „Milijunaš“. Omerov volonterski put kreće iz njegovog rodnog Teočaka, gdje je jedno vrijeme obnašao funkciju predsjednika Vijeća mladih općine Teočak, a nakon što je upisao medresu, počinje biti aktivan u Fondaciji tuzlanske zajednice u programu „Omladinska banka“. Nakon upisa na fakultet svoj volonterski angažman nastavlja u Fondaciji „Izvor nade“ i Udruženju „Mladi za mir“, gdje je stekao bogato iskustvo i naučio kako spajati i popravljati, a ne dijeliti i uništavati zajedničko naslijeđe i kulturno blago Bosne i Hercegovine. Kaže da mu je sve to pomoglo da postane dio Fondacije Hastor koja spaja mlade iz čitave države koji dijele ista ili slična interesovanja. U protekloj godini bio je na razmjeni studenata u SAD-u u okviru programa „Global UGRAD Student Exchange Program“ na Univerzitetu Houston-Victoria u Teksasu kao jedini student iz Bosne i Hercegovine koji je prošao zahtjevan selektivni proces na ovom programu. Naš stipendista je svoje volontiranje nastavio i u SAD-u, u Organizaciji „Meals on Wheels South Texas“ gdje pomaže u pakovanju i distribuciji obroka za socijalno ugrožene osobe što govori koliko mu je stalo da svojim malim koracima radi na promjeni društva i zajednice.



Fondacija Hastor mi je puno pomogla u mom ličnom i profesionalnom razvoju. Pružila mi je mogućnost da sve što sam do sada naučio kroz neformalno i formalno obrazovanje te razna putovanja prenesem na druge stipendiste. Ako ti kao osoba skupljaš znanje i iskustva, a nemaš kome da ga preneseš, ono ostaje samo za tebe i nema diseminacije istog. Upravo kroz Fondaciju sam uspio da druge potaknem da budu aktivni i da se pomjere s mjesta te da krenu u ostvarivanje svojih ličnih ciljeva, ambicija i snova i iznimno mi je zadovoljstvo kada vidim da sam uspio u svojoj namjeri. Fondacija Hastor je mjesto koje nam pruža mogućnost da se u svakom momentu možemo javiti s nekom idejom koju će ona velikodušno i objeručke podržati.

Amina Bukvarević

Amina Bukvarević porijeklom je iz Kalesije i studentica je treće godine Medicinskog fakulteta, Odsjek zdravstvenih studija, smjer Medicinsko laboratorijska dijagnostika na Univerzitetu u Tuzli. Stipendistica Fondacije Hastor je od 2012. godine. Osim u okviru Fondacije Hastor, Amina volontira i u Udruženju „Ženo, majko, sestro“ i Udruženju „Osmijeh nade“. Kao osoba koja mnogo voli djecu, uživa volontirajući s mlađim stipendistima i djecom s poteškoćama u razvoju. Veseli je i usrećuje svaki iskreni osmijeh djeteta jer smatra da su to najiskrenija bića na svijetu od kojih se mogu naučiti najvažnije pouke u životu. Osim volontiranja voli čitanje knjiga čija se tematika bazira na psihologiji. Kada je postala stipendista Fondacije Hastor, bila je sretna jer je dobila finansijsku pomoć za školovanje ne sluteći koliko će se emotivno vezati za sve ono što Fondacija jeste. Dobila je moralnu podršku, vjetar u leđa i motivaciju za sve što radi u životu. Postala je sigurnija u sebe i odlučnija u ostvarenju svojih ciljeva. Krenula je s izgrađivanjem novih vještina, a počela je i da aktivno volontira i pomaže drugima.



Fondacija Hastor me osvijestila da imam jedan život koji mi je dat. U tom životu imam mnoge prilike da pomažem, činim dobro i utičem na korisne i pozitivne promjene u društvu. Te prilike ne smijem propustiti jer svako od nas može da doprinese kreiranju bolje budućnosti. Fondacija Hastor me naučila da život nije vrijedan ukoliko ne dijelimo, ne poklanjamo, ne pomažemo i ne dajemo i zato joj veliko hvala na tome. Moja poruka za stipendiste je da trebaju ulagati u svoje znanje i obrazovanje, biti produktivni, pomagati drugima oko sebe, graditi nove vještine i na taj način biti od koristi sebi, lokalnoj zajednici i društvu u cjelini.

Anela Mušanović

Anela Mušanović dolazi iz Sarajeva i djevojka je koja, kada je riječ o razvoju i ličnom napretku, ne poznaje granice. Iako ju je život na razne načine sputavao, ona je iz svakog iskušenja izlazila jača i pozitivnija. S godinu dana života oboljela je od dijabetesa s kojim živi i dan-danas, no to ju nije spriječilo da napreduje i postiže izvanredne rezultate. U međuvremenu je postala i dio porodice Fondacije Hastor. Ove godine je diplomirala na Veterinarskom fakultetu u Sarajevu i tako ostvarila dječiji san. Veliki je perfekcionista, a u slobodno vrijeme voli čitati knjige, naročito iz oblasti psihologije. Svoj volonterski put započinje kroz volontiranje u Fondaciji Hastor, a onda svoje slobodno vrijeme i ljubav prema životinjama i volontiranju uklapa u jednu perfektu cjelinu koja sada ispunjava njen život. Na trećoj godini fakulteta počela je volontirati u veterinarskoj stanici kako bi uporedo sa studiranjem sticala i znanje u praksi. Volontiranje s djecom i sticanje novih radnih navika njena su svakodnevica. Činjenica da mlađi stipendisti, s kojima volontiraju stipendisti Fondacija Hastor, postaju upravo ono što im mentori prezentiraju i ono što u njima vide inspiriše je da bude odgovorna i posvećena svakom djetetu ponaosob. Trudi se ostvariti dobru interakciju s učenicima u svojoj volonterskoj grupi te, prije svega, biti im prijatelj, a tek onda mentor. Upravo ono što stipendisti u Fondacija Hastor svaki mjesec iznova uče.



Naše porodice, svaka za sebe, zasnovane su uglavnom na različitim postulatima, a Fondacija Hastor je za svakoga od nas zasnovana na istim – nesebičnom pomaganju, empatiji i dobrim primjerima. Tu učimo ponovno da hodamo, da pričamo i da širimo krila samo onda kada smo u potpunosti spremni da letimo. Tu nas je puno, a opet smo jedno.

Ona smatra da našu Fondaciju predstavljajući sebe na najbolji mogući način na ulici, dok šetamo, dok čuvamo okolinu, dok pomažemo drugima, dok se tuđem uspjehu radujemo kao svom, dok svakodnevno postajemo bolje verzije sebe i takmičimo se s onim sobom od jučer.

Izudin Beganović

Izudin Beganović dolazi iz Sarajeva, a nedavno je stekao titulu doktora medicine. Stipendista Fondacije Hastor je dvije godine, a u prethodnoj akademskoj godini bio je član administrativnog tima Fondacije Hastor. Volontiranje u Fondaciji Hastor nije njegovo prvo iskustvo u volontiranju. Tokom srednjoškolskog obrazovanja bio je član Fondacije „Izvor nade“, gdje je stekao svoja prva volonterska iskustva kako s mlađom populacijom tako i u lokalnoj zajednici. Izudin nerado priznaje da je, nakon što je upisao Medicinski fakultet, morao svoje vrijeme maksimalno posvetiti akademskoj karijeri i bio je primoran smanjiti obim svojih volonterskih aktivnosti. U toku završne godine studija, kada su obaveze na fakultetu manje, imao je idealnu priliku da svoje dotadašnje iskustvo i ljubav prema volontiranju oživi kroz aktivnosti u Fondaciji Hastor. U posljednje vrijeme, kako ističe, Izudin svoj rad nastoji fokusirati na volontiranje i produblivanje praktičnog znanja. Najnovija aktivnost takve vrste je volontiranje u Hitnoj pomoći. Na taj način se trudi da slobodno iskoristi doprinoseći razvoju lokalne zajednice, a u isto vrijeme i da nadogradi i poboljša svoje znanje za koje su mnogi studenti, nažalost, ostali uskraćeni tokom perioda pandemije virusa COVID 19.



Biti stipendista Fondacije Hastor za mene je velika čast i zadovoljstvo. Finansijska podrška je samo jedan segment u moru stvari koje mi je omogućila. Ono najvažnije što je Fondacija Hastor za mene uradila jeste to da mi je otvorila nove poglede na to koliko jedan pojedinac može doprinijeti društvu. Iskustvo spajanja ljudi s različitih područja i znanosti, a da pri tome svi imaju samo jedan cilj – nesebično dijeljenje iskustva i znanja kako bi svi zajedno napredovali i unaprijedili našu zajednicu – može se doživjeti samo u okvirima Fondacije Hastor.

Andrej Gradina

Andrej Gradina dolazi iz Sarajeva i student je pete godine na Muzičkoj akademiji Univerziteta u Istočnom Sarajevu na Odsjeku za gitaru. Ljubav prema muzici gaji od djetinjstva te je završio osnovnu i srednju muzičku školu najboljim uspjehom osvojivši uz to i niz nagrada i priznanja na internacionalnim, državnim i federalnim takmičenjima i festivalima. Član je Vokalno-instrumentalnog sastava „Oskar Danon“ pri kojem je izveo svečani koncert povodom 120 godina postojanja Sarajevske sinagoge, a na nedavnom internacionalnom takmičenju Guitar United osvojio je prvu nagradu i dobio kotizaciju za „Transilvania International Guitar Festival“ koji se održava u gradu Cluj-Napoca u Rumuniji. Jedno od bezbroj korisnih iskustava koje je stekao kao stipendista Fondacije Hastor jeste volontiranje. U slobodno vrijeme uživa u kuhanju te je svoje volontiranje usmjerio u tom smjeru i već dvije godine je volonter u Restoranu dobre volje pri neprofitnoj organizaciji Pomozi.ba. Za ovo volontiranje kaže da mu svakodnevno pruža nemjerljivo zadovoljstvo, a volontira kao pomoćnik glavnim kuharicama. Pored toga, ističe koliko su mu edukativni sastanci koje je kao mentor vodio s grupom srednjoškolaca iz Čelića bili korisni i zanimljivi. Od svih aktivnosti koje je imao u sklopu Fondacije Hastor posebno ističe volonterski rad s djecom koja imaju oštećenje vida.



Kao najvrednije iskustvo koje mi je Fondacija Hastor priuštila ističem volontiranje s djecom koja imaju djelimično ili potpuno oštećenje vida. To je volontiranje kroz koje sam uvidio njihove potencijale i mogućnosti i radio na njihovom razvoju. Zahvaljujući upoznavanju s njima shvatio sam koliko je značajno da svako od nas „raste“ u motivirajućem i sigurnom okruženju, uz podršku i motivaciju. Također, oni su mi pokazali da invaliditet nije nešto što može predstavljati ograničavajuću prepreku sve dok imamo nekog ko u nas vjeruje, ko nas podržava i usmjerava dalje. Nakon svega ovoga slobodno mogu reći da mi je najveća motivacija za redovnu aktivnost u društvu pomoć drugima u kojoj vidim najveću ljepotu i inspiraciju za volonterski rad, priča Andrej.

Svoju ljubav prema muzici Andrej je odlučio utkati i u svoja volontiranja, smatrajući to izvrsnim načinom da se poboljšaju dječije sposobnosti učenja, kreativnosti i razvoja fine motorike.

Samra Đuderija

Samra Đuderija je rođena u Sarajevu, gdje živi i danas. Završila je Srednju medicinsku školu Jezero, smjer Pedijatrijska sestra – tehničar. Svoje formalno obrazovanje nastavila je u pravcu medicine upisavši Medicinski fakultet Univerziteta u Sarajevu. Ističe da se za ovaj studij opredijelila zbog želje da pomaže i olakšava ljudima te da im vraća nadu u bolje sutra. Kako je riječ o jednoj od najboljih studentica na ovome fakultetu, već tokom studija izabrana je u zvanje demonstratorice na Katedri za medicinsku mikrobiologiju i parazitologiju, za što ističe da je zaslužna i Fondacija Hastor. Budući da jako voli djecu, redovno volontira i u vrtiću „Al Isra“. Gledajući djecu, shvata i razumijeva koliko zapravo ljubavi ima među njima, bez obzira na boju, stalež ili vjeru. Vjerovatno je to Samrin bijeg od realnosti, od svega što se dešava u svijetu. Djeca imaju najčistije srce i podsjećaju je, kako kaže, da i njeno ostane tako. Gledajući njih, dobila je želju biti dio generacije koja će raditi na boljoj budućnosti za svu djecu. O volontiranju u navedenom vrtiću i ulozi Fondacije Hastor, Samra navodi:



Znala sam za volontiranje i prije nego što sam postala stipendista, ali nikako nisam znala odakle početi. Trebao mi je oslonac i vodilja, ukratko, trebala mi je Fondacija Hastor. Fondacija me učinila odgovornijom, otvorenijom, spretnijom i dala mi je ono najvažnije, oslonac za moju dalju budućnost. Naučila me je da budem bolja osoba, da poštujem druge i da budem uvijek ruka vodilja mladima. Trudim se da je predstavim u najboljem svijetlu, prijateljima pričam o njoj i predstavljam samo jedan dio onoga što ona čini za nas.

Ajla Vrebo

Fondacija u Ajlinom životu zauzima značajnu ulogu. Kroz dosadašnje godine volontiranja Fondaciju je doživjela kao čuvara koji joj je dodijeljen jer je bila vrijedno i uzorno dijete. Taj isti čuvar još uvijek ju pomno prati i daje joj motivaciju.

S pojmom volontiranja upoznala se nakon što je postala dio porodice Fondacije Hastor i ono je svakodnevno postajalo dio njene rutine te se učlanila u razne nevladine organizacije, a jedna od njih je Organizacija „Bravo“, gdje obnaša uloge člana Upravnog odbora te projektne asistentice.



U Fondaciji Hastor volontiram od petog razreda osnovne škole. Moji prve sastanke pamtit ću po mentorici Belmi s kojom sam i danas u kontaktu. Kada sam i sama postala mentorica, znala sam šta želim postići time – prenijeti što više pozitivnih iskustava na grupu. Volontiranje mi je donijelo brojne prednosti, stečenih novih znanja i vještina, a kada se okušate u ulozi mentora, razvijate vještine koje su meni, između ostalog, služile kao potpora za dalje razvijanje.

Kao jednu od prednosti volontiranja u Fondaciji Hastor Ajla izdvaja činjenicu da kada dobijete status studenta, imate opciju pridružiti se nekima od timova poput administracije, tima za monitoring i sl. a takvi timovi daju novi i drugačiji pogled na riječ volontiranje i kroz isti se mogu steći brojne nove vještine. Fondaciju pored roditelja smatra najvećom podrškom kroz cijeli period školovanja jer je njoj i njenim roditeljima mnogo pomogla i u finansijskom smislu i tako na još jedan način bila vjetar u leđa.



● PREDSTAVLJANJE DIPLOMANATA I MAGISTRANATA 2022/2023.



DIPLOMANTI

Abdelaziz Ahmed Hassan Aiša
Arnaut Ajla
Avdić Lejla
Bahor Melisa
Bajramović (Salkić) Adisa
Barukčić Anđela
Bašić Amina
Breščić Lejla
Bulić Semina
Ćibo Amina
Ćosić Daria
Ćukas Nermina
Đulić Edina
Durak Azra
Duvnjak Alema
Džiho Melisa
Đapo Lejla
Đukić Aleksandra
Ejubović Jasmina
Elezović Merima
Eminović Lejla
Ergun Neyla Yasemin
Fazlihodžić Aida
Gačić Fatima
Galijašević Nejra
Geko Minela
Gradina Andrej
Graho Nejla
Hadžić Adna
Hadžić Asja
Hadžo Harun
Halilbegović Šejla
Hodžić Esma
Hodžić Inela
Hopovac Smail
Horić-Šabić Lamija
Hrnjica Zerina
Hrnjica Edis
Husić Nihada
Husić Selma
Huskić Nadija
Ibrahimović Saida
Idriz Armin
Jakupović Adna
Jelić Gabriel
Josipović Aleksandar
Kahrman Amina
Kamberović Sara
Karabeg Una
Karahmet Dalila
Karić Dina
Kasumović Fatima
Kenjić Ivona
KolićbNadina
Komarac Lejla
Kozlić Nermina
Krivokapa Rijad
Krnjić Amna
Kuduzović Sara
Kukavica Vanja
Mašić Lejla
Mehmedagić Enisa
Merdić Fadil
Mešić Aida
Muhamedbegović Aida
Mujaković (Ahmetbegović) Dženita
Mujanović Mejrema
Muminović Omer
Muratović Vanja
Nuhić Amina



MAGISTRANTI

Abaspahić Amina
Aletić Hadžimejlić Jasmina
Arifović Esma
Avdibegović Amela
Bačić-Arifagić Melisa
Baltić Amir
Beganović Izudin
Čamdžić Ajka
Čaušević Mersiha
Dudić Mersiha
Fadžan Almedina
Gagić Nikolina
Hadžić Maida
Hadžifejzović Merjam
Halilović Jasmina
Halilović Jasmina
Halilović Sevleta
Harbaš Lejla
Helać Hanna
Helvida Amina
Hrnjić Dženita
Hrvat Ajla
Hurko Indira
Huseinbašić Vedad
Islamović Semra
Kadušić Ajdina
Karić Anisa
Kutlovac Almina
Latifović Mustafa
Martinović (Džalto) Luciana
Materne Sara-Farah
Mehanović Ešref
Mehmedović Alija
Memić Ajdin
Mlivo Emira
Mušanović Anela
Nešust Semra
Omerović Almedina
Otuzbir Hadžo
Pušina Amra
Redžepi Saleha
Smajić Irmela
Šišić Čaluk Majra
Tepić Emrah
Terzić Amel
Zenkić Adela
Zorlak Amina
Zukić Aldijana

Amra Pušina



Amra Pušina dolazi iz Ilijaša i, diplomiravši na Medicinskom fakultetu Univerziteta u Sarajevu, postala je doktorica medicine. Tokom studija pet puta bila je dobitnica priznanja Ponos dekana za najboljeg studenta u svojoj generaciji te dobitnica nagrade Federalnog ministarstva obrazovanja i nauke. Fondaciji Hastor pridružila se na četvrtoj godini studija i za nju je vežu lijepa sjećanja i uspomene.

Osim finansijske podrške, Fondacija Hastor stvara mrežu mladih, uspješnih, vrijednih, empatičnih ljudi koji promovišu obrazovanje, društvene i moralne vrijednosti i koji su oslonac jedni drugima. Sklopila sam brojna prijateljstva, naročito s mlađim stipendistima kojima sam bila mentor. Iako je to veoma odgovorna uloga, osjećam zadovoljstvo što sam imala priliku prenositi znanje, iskustvo i biti podrška tim mladim ljudima, jer naše je samo ono što damo drugima.

Majra Šišić Čaluk

Majra Šišić Čaluk završila je Prirodno-matematički fakultet Univerziteta u Sarajevu, smjer Teorijska fizika, i u toku ove akademske godine stekla je zvanje magistra fizike. Pored toga, sve vrijeme volonterski je radila u Društvu fizičara i nadarene učenike spremala za internacionalna takmičenja gdje su predstavljali Bosnu i Hercegovinu. Zahvaljujući svom visokom prosjeku i brojnim uspjesima tokom studiranja, dobila je ponudu za zaposlenje u sklopu fakulteta na funkciji asistenta na Odsjeku za fiziku. Tu ponudu je prihvatila i uskoro počinje s radom. Kako ističe, naredne godine ima u planu upisati i doktorat na PMF-u Sveučilišta u Zagrebu.

Fondacija Hastor je uz mene od moje treće godine studija i predstavlja veoma značajan dio moga života. Pored finansijske podrške, kroz Fondaciju sam naučila veoma važne lekcije - šta je to pomaganje, zajedništvo, altruizam... Zahvalna sam Fondaciji i ponosna da kažem da sam dio Njene velike porodice.



Vedad Huseinbašić




Vedad Huseinbašić završio je Medicinski fakultet Univerziteta u Sarajevu i u toku svog školovanja bio je vrijedan student i postizao velike uspjehe. Bio je član Udruženja studenata medicine (BoHeMSA) i Međunarodne studentske medicinske asocijacije u Bosni i Hercegovini. Osim toga, organizirao je mnogobrojne kongrese i aktivno učestvovao na nekoliko studentskih razmjena u drugim državama. Vedad je i koautor rada „Prepoznavanje, procjena i liječenje pacijenata sa potresom mozga“ na Tuzla Brain Week kongresu 2021. godine, a uspješno je završio i napredni kurs hirurškog šivenja. Ponosni je stipendista Fondacije Hastor punih 12 godina. Akademsko i profesionalno usavršavanje planira nastaviti u Bosni i Hercegovini, a oftalmologiju izdvaja kao granu medicine u kojoj se definitivno može vidjeti u budućnosti.

Kada ljudi govore o uspjehu, često se referišu na onaj akademski. Međutim, ja bih se osvrnuo na lični napredak, karakter, stabilnost, emocionalnu inteligenciju, liderstvo i timski rad, solidarnost i plemenitost kao fundamentalne stvari koje sam razvio i poboljšao kroz svoj angažman u Fondaciji Hastor. Istinski sam zahvalan za sve prilike koje su mi pružene kroz moju Fondaciju, za sve nove ličnosti koje sam upoznao, za svaku pomoć, a posebno mi je drago što je Fondacija primjer jedne male grupe ljudi koji mogu učiniti velike stvari.

Anisa Karić

Anisa Karić porijeklom je iz Sarajeva i trenutno privodi kraju master tezu na Arhitektonskom fakultetu Univerziteta u Sarajevu. Arhitektura je, kako ističe, bila njena ljubav još od djetinjstva te su i njeni planovi za budućnost usko vezani za ovaj kreativni svijet u kojem svakodnevno uživa. Svoje znanje stečeno na fakultetu imala je priliku praktično koristiti još kao studentica dajući svoj doprinos uređenju enterijera prostorija Fondacije Hastor.

Jedno od mojih najposebnijih i najznačajnijih iskustava bila je prilika za stipendiju Fondacije Hastor. Tu sam na određeni način napravila i svoje prve profesionalne korake, što za mene predstavlja veliku čast. Sretna sam što sam na neki način uspjela reći hvala Fondaciji Hastor koja je uvijek bila uz mene podržavajući me u obrazovanju i životu. Zahvalna sam i sretna što sam bila dio velike porodice Fondacije Hastor, upoznala divne, ambiciozne ljude koji su dokaz da je ljudskost najvažnija vrlina. Kada vjerujemo u sebe i podržavamo jedni druge, ne postoji prepreka koju ne možemo savladati.



● RUKOVODSTVO ALUMNI KLUBA

Na Osnivačkoj skupštini Alumni kluba Fondacije Hastor u ovoj godini izabrano je prvo rukovodstvo Alumni kluba Fondacije Hastor, i to u sljedećem sastavu: **Marizela Hadžić** (predsjednica Skupštine), **Emina Sijahović** (potpredsjednica) i **Alem Merdić** (sekretar), koje će Alumni klub dalje voditi u narednom periodu, a u nastavku teksta predstavljamo vam članove prvoizabranog rukovodstva.

Marizela Hadžić stipendistica Fondacije Hastor postala je u prvim godinama njenog osnivanja i svjedočila je rastu i stalnom napretku Fondacije Hastor. Diplomirani je inženjer saobraćaja i komunikacija, Odsjek za komunikacijske tehnologije i trenutno je zaposlena u firmi AudIT d.o.o. na poziciji senior konsultanta. Ističe kako je prve korake u profesionalnom životu načinila upravo uz pomoć Fondacije Hastor koja joj je uvijek bila oslonac i motivacija te joj je uveliko pomogla u izgradnji samopouzdanja i ostvarivanja vlastitog potencijala.

Fondacija Hastor je od svog nastanka bila okosnica pozitivnih priča i dobrih ljudi. Biti dijelom Fondacije kroz period odrastanja i školovanja je imalo značajan utjecaj na mene kao mladu osobu koja tek počinje graditi svoj život. Kroz projekte volontiranja i pomaganja drugima u Fondaciji Hastor razvila sam socijalne vještine te naučila više o društvenoj odgovornosti i jačanju solidarnosti. U konačnici, Fondacija mi je pružila jedinstvenu priliku za povezivanje s drugim ljudima i stvaranjem najljepših prijateljstava na čemu sam neizmjereno zahvalna.

Marizela Hadžić



Emina Sijahović porijeklom je iz Maglaja, a trenutno je docentica na Poljoprivrednom fakultetu Univerziteta u Sarajevu. Stipendistica Fondacije Hastor postala je na 3. godini i, kako ističe, Fondacija ju je od tada na svojevrsan način uvijek pratila kroz njen život. Još kao student volontirala je i upoznavala brojne koristi volonterskog rada kroz volonterski angažman u Fondaciji Hastor koja je Emini pomogla i da stekne svoja prva radna iskustva. U Fondaciji Hastor je stekla brojna prijateljstva koja traju i danas, što će ju zasigurno zauvijek podsjećati na Fondaciju. Iako je formalni dio akademskog obrazovanja privela kraju doktoriravši na fakultetu, Emina smatra kako je još puno toga što treba naučiti i to je njena najvažnija motivacija – cjeloživotno učenje.

Emina Sijahović



Najbolje ljude i najbolje prijatelje upoznala sam u Fondaciji Hastor koja je neminovno utjecala na mnoge moje životne odluke i bila je tu kada mi je najviše trebala te na taj način postala značajan dio moje životne priče. Bila sam dijelom svih tipova volonterskih aktivnosti u Fondaciji Hastor, zbog čega sam danas jako sretna i zahvalna jer sam u to vrijeme usput učila brojne korisne stvari koje su mi kasnije mnogo značile. Pronašla sam se u svim tim volonterskim ulogama i zaista sam uživala u njima znajući da radim i dobre i korisne stvari za moju zajednicu. Posebno bih izdvojila to koliko sam sretna kada danas na društvenim mrežama prepoznam mlade ljude koje sam upoznala u Fondaciji i kojima sam bila mentor kako uspješno grade svoj poslovni i privatni život.



Alem Merdić je doktor ekonomskih nauka, zaposlen kao docent na Ekonomskom fakultetu u Zenici. Prvi ciklus studija završio je na Ekonomskom fakultetu u Zenici, Odsjek za računovodstveni i revizijski menadžment, kao najbolji student u generaciji. Za izvanredne rezultate u toku studija nagrađivan je različitim priznanjima, a u akademskoj 2015/16. godini proglašen je najboljim studentom na javnim ekonomskim fakultetima u Federaciji Bosne i Hercegovine (dodiplomski i master studij) s prosječnom ocjenom 10.0. Na Ekonomskom fakultetu u Zenici angažovan je od 2014. godine, gdje danas radi kao profesor u zvanju docenta. U dosadašnjem akademskom radu objavio je dvije knjige, kao univerzitetsko izdanje, desetine naučnih radova u indeksiranim časopisima i zbornicima radova s domaćih i međunarodnih konferencija, te je učestvovao u realizaciji domaćih i međunarodnih naučno-istraživačkih i stručnih projekata. Stalni je sudski vještak ekonomske struke. Doktorski studij na studijskom programu Ekonomija i biznis završio je 2022. godine na Ekonomskom fakultetu Univerziteta u Tuzli, s ukupnom prosječnom ocjenom 10.0.

Alem Merdić



Stipendiju Fondacije Hastor sam dobio u vrijeme kada mi je zaista bila potrebna finansijska podrška kako bi se osigurao bezbrižan nastavak studija. Međutim, pored finansijske podrške, biti dio ove harmonične porodice Fondacije Hastor znači i uvijek imati moralnu podršku, poticajno okruženje koje vas insipiriše da uložite dodatni trud, dajete više od sebe, kreirate, radite i stvarate u interesu društva kao cjeline, doprinosite ispunjavanju misije i vizije Fondacije Hastor te ličnom i profesionalnom razvoju. Biti članom Fondacije Hastor ne znači samo primiti stipendiju, Fondacija nas uči odgovornosti, humanosti, patriotizmu i solidarnosti, Fondacija nas uči dobru. Danas živim ideju i principe Fondacije, duboko svjestan da su to univerzalne vrijednosti za kreiranje dobra bez obzira na vrijeme u kojem živimo i radimo.

● IZJAVE TRENUTNIH I BIVŠIH STIPENDISTA

Fondacija Hastor se činila kao pojam koji bi mogao promijeniti moj život.

Dolazak Fondacije u moj život predstavljao je dolazak nove nade i zrake sunca.

Vjerujem da nikada ne bih niti upisala fakultet da nemam Fondaciju uz sebe. Ne samo da ste olakšali meni život i školovanje već i mojoj mami, sestrama i bratu. Svi su osjetili ovu podršku koju imam.

Fondacija Hastor mi je zasigurno uljepšala i olakšala školske dane.

Dok nisam bila član Fondacije nisam ni znala šta znači biti volonter i šta je volonterizam. Zahvaljujući upravo Fondaciji Hastor zavoljela sam volonterizam i to je jedna od stvari koja mene ispunjava. Hvala vam puno što činite velika čuda samim vašim postojanjem.

Fondacija Hastor je reprezent onoga što bismo mi, učenici i studenti, trebali biti.

Ono što je najvažnije od svega, naučila sam pomagati drugima i biti im podrška ne očekujući ništa zauzvat, to je jedna od najljepših osobina koja se može ponijeti iz dugogodišnjeg druženja!

Našla sam pomoć i emocionalnu podršku u svojim mentorima, od kojih neke zaista smatram svojim prijateljima.

Uloga Fondacije Hastor u mom životu je bila presudna da srušim mentalne prepreke koje su me sprečavale da pokažem svoj potencijal.

Moja me Fondacija naučila da se zaista svaki trud isplati i da se dobro vraća još boljim!

Fondacija mi je dala do znanja da za svaki problem ima rješenje i da ima neko kome se uvijek mogu obratiti i podijeliti nešto kako dobro tako i loše. Dala mi je do znanja da sam dio jedne velike porodice kako danas tako sutra i zauvijek.

Pružila mi je mogućnost da danas budem odgovoran i dostojanstven akademski građanin.

Fondacija je za mene primjer poželjne Bosne i Hercegovine u malom, tamo gdje članovi društva srdačno pomažu jedni drugima, gdje su svi poštovani bez obzira na njihov status te želja za napredak je istinska, a još važnije, zajednička.

Bez Fondacije Hastor moj život sigurno bi bio komplikovaniji, stresniji, negativniji. Fondacija Hastor je dala puno prilika učenicima koji su iz ruralnih mjesta kao što sam i sam dijete sa sela. Kroz Fondaciju sam stekao sasvim druge i najpozitivnije poglede na život koje sam mogao dobiti. Kroz stipendiranje sam stekao društveno odgovorne osobine na kojima ću biti zahvalan cijeli život.

Kako sam studirala u Sarajevu i bila blizu Fondacije, imala sam osjećaj da je jedna moja porodica tu, iako sam daleko od svih ostalih svojih bližnjih.

Fondacija Hastor je sinonim za iskrenog prijatelja.

Zahvalna sam na svemu, ali te osobine empatije, solidarnosti, ljubavi i ljudskosti koje je Fondacija Hastor usadila dodatno u mene nemaju cijenu.

Imala sam osjećaj da mi je kroz cijelo školovanje neko „čuvao leđa“, da je sve lakše bilo prebroditi.

Podrška koju je teško opisati riječima. Koračati kao član najbolje organizacije mladih i talentovanih ljudi Fondacije Hastor, kao neko odabran od strane najboljih, izrasti u velikog čovjeka, ne samo uz novčanu pomoć već i svaki vid podrške, mnogo znači. A šta je najvažnije? Fondacija i nakon svega ne zaboravlja na svoje stipendiste. To se zove ljubav.

Fondacija Hastor u mom životu će uvijek predstavljati zvijezdu vodilju i način na koji bih ja želio živjeti i postupati u životu.

● KLUB PRIJATELJA I DONATORA



Kroz sedamnaest godina svog postojanja Fondacija Hastor svakodnevno unapređuje svoje aktivnosti i djelovanje, a sve u cilju ulaganja u obrazovanje i izgradnje kvalitetnijeg i prosperitetnijeg bosanskohercegovačkog društva. Zahvaljujući angažmanu svih koji se svojim radom i djelom vežu za Fondaciju Hastor, prvenstveno njenog kolektiva, razvila se u najznačajniju i najveću fondaciju ove vrste na području Bosne i Hercegovine i regiona. Danas, kada Fondacija ponosno broji više od 2200 stipendista, uz nju stoji mnoštvo prijatelja i donatora koji prepoznaju misiju Fondacije i aktivno je podržavaju. Svojom nesebičnom podrškom te odlukom da svoju društvenu odgovornost usmjere ka investiranju u obrazovanje, naši prijatelji i donatori čine mogućim dugoročnu misiju Fondacije Hastor s vjerom da pozitivne promjene u društvu i njegova svjetlija budućnost dolaze zajedničkim radom, znanjem i uspješnim školovanjem.



VOLONTERI FONDACIJE HASTOR

Aganspahić Sead	Kulo Begić Emra
Ahmetović Edin	Kučuk Adisa
Bašić Nejra	Manov Ismira
Broz Zoran	Mašnić Selma
Čerkez Timur	Merdić Alem
Čivgin Nihad	Milinović Linda
Dedić Amela	Morankić Feđa
Delić Sanel	Moro Haris
Dumanjić Samir	Musić Indira
Đapo Haris	Mustafić Samir
Đonlagić Lejla	Palić Safet
Glavović Džejla	Pašić Rabija
Hadžić Edin	Planinčević Nermina
Hadžić Marizela	Pulić Mirza
Hadžić Mehmedalija	Redžepović Aida
Hadžiselimović Eldin	Redžepović Samir
Hajdarević Dželila	Rizvo Marizela
Hasanović Merima	Rustemović Anida
Haskić Samira	Sarajlić Haris
Hodžić Adnan	Sijahović Emina
Huseinović Šukrija	Smajkan Aldijana
Husnić Maida	Šesto Muniza
Jalimam Emir	Tabaković Dino
Jusufović Rasim	Tahirović Jasmin
Kiblić Alma	Vrabac Džana
Kovačević Mirsada	Vuk Edina

...i još mnogo volontera čija imena nismo naveli, jer nemamo dovoljno stranica da bismo ispisali sva njihova imena, a kamoli priče kojima su nas godinama činili ponosnim i inspirisali da nastavimo činiti dobro.

● PRIDRUŽITE NAM SE

Fondacija Hastor je organizacija koja punih 17 godina djeluje na području Bosne i Hercegovine tako što ulaže u obrazovanje djece i mladih, a posebno onih koji su marginalizirani usljed teškog socio-ekonomskog statusa i sredine u kojoj žive. Podstaknuta idejom da olakša školovanje i poboljša uslove života djece i mladih, Fondacija Hastor je do sada podijelila skoro 24.000 godišnjih stipendija na području cijele Bosne i Hercegovine. Od samog početka djelovanja ohrabrujemo osnovnoškolce, srednjoškolce i studente da nam se jave i postanu dio velike porodice Fondacije Hastor. S obzirom na to da na adresu Fondacije Hastor svakodnevno pristiže veliki broj molbi za stipendiranje, nismo u mogućnosti prihvatiti i podržati sve one koji nam se jave iako to zaista želimo. Selekcija kandidata predstavlja jedan od najtežih zadataka naše komisije jer smo nerado i teška srca prisiljeni da određeni broj molbi odbijemo, stoga nam je potrebna izvjesna podrška prijatelja kako bi veliki broj mladih i perspektivnih učenika i studenata dobio priliku za ostvarivanje svojih želja i snova. Naša misija iz godine u godinu jeste da osiguramo sredstva za stipendiranje velikog broja učenika i studenata, a uz sve to Fondacija Hastor čvrsto stoji uz svakog stipendistu, pružajući mu svu potrebnu podršku i pomoć do okončanja obrazovanja i pronalaženja zaposlenja, što je glavni cilj svakog stipendiste. Ovim putem pozivamo sve pojedince, kompanije i organizacije da postanu dio Kluba prijatelja Fondacije Hastor i pomognu nam da veliki broj stipendista dobije priliku za uspješno obrazovanje tako što će na svojevrsan način doprinijeti osiguravanju finansijskih sredstava za stipendiranje djece i mladih širom čitave Bosne i Hercegovine. Pridružite se našoj misiji kako bismo zajedno ostvarili snove perspektivnih učenika i mladih ljudi koji trebaju našu pomoć!



**Ukoliko želite podržati rad Fondacije Hastor,
uplatu donacije možete izvršiti na jedan od transakcijskih računa:**

ASA Banka dd Sarajevo 1346101000825159

Unicredit Bank dd Sarajevo 3389002201775656

Raiffeisen Bank BH dd Sarajevo 1610000055230065